

四庫全書

集部

欽定四庫全書

大雅集卷六

元 賴良 編

馮子振

字海粟

楊花二首

曾與行人惜翠條而今飛絮滿河橋  
一分流水萍初碎  
百尺春風雪未消  
微撲粧樓啼半面  
乍粘舞席折纖腰  
沾泥更傍誰家砌  
簾戶新聲紫燕嬌

婉婉春光與願違  
悠揚風日暫無輝  
不隨芳樹千林歇  
還趁游絲百尺飛  
夢落吳蠶欺薄縠  
心隨代馬戀征衣  
鳳池踪跡逡巡到  
未忍飄零拂釣磯

袁伯長

寄僧

白塔亭亭透夕陽  
芭蕉深處碧窓涼  
江神夜誦光明偈  
天女朝聞解脫香  
齋鉢午空烏守樹  
經臺雲冷鶴歸房  
平生願結西方社  
却笑淵明作吏忙

寄子昂

故國王孫佩楚蘭春雲涼月倚朱欄玉簫曲趁鶯聲轉  
金鼎香隨蝶夢殘碧沚波清堪把釣黃塵風急倦彈冠  
外家文物惟君在笑我冰姿跨曉鞍

張翥

字仲舉

寄周伯溫

天子臨軒授鉞頻江南無地不紅巾鐵衣遠道三軍老  
白骨中原萬鬼新義士英靈虹貫日仙家談笑海揚塵

多將滿眼淒涼淚哭盡平生幾故人

送宋本禮部狀元調選還京

聖主求賢禮數崇策名高步冠南宮  
乘槎析木天津上奏賦甘泉鹵簿中  
染翰墨凝仙掌露護衣香散御爐風  
只今帝業熙千載正待儒臣黼黻功

寄陳子華時留淮海

鳳在陽岡鶴在臯相思空遣夢魂勞  
簫吹夜月江橋酒槎泛秋風海市濤  
故國山川吳分野美人詞賦楚離騷

瓊花新製爭傳寫應使揚州紙價高

項炯

字可立

金陵懷古

江左夷吾浪得名  
豫州英槩亦沈冥  
夕陽枯樹山如赭  
秋雨荒臺草自青  
漢苑玉魚誰復葬  
昭陵石馬已無靈  
可憐白髮商人婦  
猶向燈前唱後庭

楚聲夜起國殤悲  
運盡東南事可知  
塞上竟推金馬去  
塚間俄見石麟隳  
祝宗端只先期死  
丞相空聞後出師

落日半江秋寂寞乳鴉猶遠萬千枝

陳文杰

字漢卿

漢陽道中

老翁八十臥田廬回望中原淚滿裾盜起山東多似螳  
民移河內半為魚總戎已見開金甲優詔曾聞下玉除  
白首孤城州縣職無由得奏一行書

吳克恭

字寅夫

送唐漢卿

春風顛狂復細微吹波蕩漿動人衣野桃葉小流鶯至  
官柳條青江鱉肥稍別未嫌頻作惡相逢自識故應稀  
腐儒竊祿真何補回首滄洲白石磯

薛常州端午雅製

端午宮詞進閣門侍臣應得忝芳樽御羅畫扇金花細  
瓮璽朱絲玉臂溫太子題詩成故事前朝報國荷殘恩  
更求醫士三年艾攜向壺冰炷自魂

張以寧



錢唐懷古

荷花桂子不勝悲  
江介繁華異昔時  
天目山來孤鳳歇  
海門潮去六龍移  
賈充誤世空無策  
庾信哀時尚有辭  
莫向中原誇絕景  
西湖遺恨似西施

題釣臺

故人已乘赤龍去  
君獨羊裘釣月明  
魯國大名垂宇宙  
漢家小吏待公卿  
天迴御榻星辰動  
人去高臺山水清  
我有長竿數千尺  
坐來東海看潮生

孫華

鳳山懷古四首

宋家事業如漢晉遺史班班今尚存南渡衣冠元帝紀  
中山廟社靖王孫海門龍去秋潮橫宮樹烏啼夕燐繁  
已恨無人似諸葛生憎何物學桓溫

王氣中流甲馬營殘星還遶鳳凰城斯文自可同三代  
諸老猶能語二京穉帝有車將白壁太皇無艦載蒼生  
只今四海漸聲教共戴堯天樂太平

天兵壓境陳宜中  
啟謝太后欲請三

宮浮海且云舟航已具后曰臨安  
十萬百姓能盡載否遂降王師

故汴人材軼漢唐東南文物尚張皇  
荆吳形勢傾丹鳳  
伊洛源流到紫陽  
宇宙自來闕歷數  
江山渾不管興亡  
空餘車馬塵埃市  
猶作鯢鵬變化鄉

莫向登臨起嘆吁  
故宮今是梵王都  
麒麟馭娑荒荆棘  
鸚鵡頻伽長苾莳  
輦道久無黃面蓋  
寢垣誰置白浮屠  
望江亭子依然好  
時有胡僧置酒壺

俞俊

字子俊號雲東華亭人

渡江

臘月六日狼山下浪花如雪勢吞舟隔江隱隱聞吳語  
去國遑遑學楚囚白髮慈親初屬望青衫倦客不勝愁  
幸存杜曲桑麻地敢望班超萬里侯

楚州夜泊

漏鼓聲頻欲四更野航燈火對愁明城頭楚語驚鄉夢  
船尾吳歌動客情漠漠水雲聽雁度蕭蕭風雨自雞鳴  
離羣遠道何嗟及未必江湖老此生

次高原朴見寄韻

年少簪花壓帽簷飛觴走竿競春纖空餘老淚青衫濕  
遮莫新愁白髮添生計有涯蠶上箔公庭無事鳥窺簾  
昔人漫說揚州鶴自笑熊魚豈得兼

董佐才

題顏炳文梧竹軒

高梧十尋竹千挺一塵不到軒中央鳳凰夜栖碧雲暖  
翡翠晝鳴蒼雪涼聲度書窓葉墮井影來棋局梢過牆

何當拂衣逐歸隱日拜慈親稱壽觴

董紀

題友人山居

烟蘿寂寂蔭柴扉路入蒼苔一徑微  
江燕定巢來自熟巖花結子落還稀  
修琴有制先抄譜沽酒無錢更典衣  
采藥山童終日去夜深常與鶴同歸

張樞

字夢辰

送友之戎幕

金吾上將開東閣白髮參軍起曲阿嚴武故人惟杜甫  
馬周知己獨常何龍蛇久鬪繫兵甲烏兔高飛避網羅  
慷慨平生兩行淚哀時更比別離多

宋處仁

字智民華亭人

杏園

天寶年中錫宴開慈恩寺裏看花來雨香曉潤金泥帖  
霞影春翻綠玉杯詩客錦囊還可賦花奴羯鼓不須催  
祇今萬樹胭脂雪遺核應慚董奉栽

灞橋

石罅蛭蚪幻殼存將軍舊業許誰論波浮沆瀣吞虹影  
玉琢連環鎖地根花信雨晴春酒館柳陰樓倚夕陽村  
蹇驢奔走紅塵客破帽題詩合斷魂

盧昇

字廷舉高唐人

為王淡淵真人題登瀛橋

仙翁作橋臨岱宗木公金母來往同銀河一夕失烏鵲  
白日半空垂紫虹雲飛每傍石檻過水流直與丹池通



我嘗曳杖躡其上彷彿如到滄溟東

束宗庚

字章孟

題如之源淪雪軒

白鶴步苔窺短楹浮烟微動鬢絲輕  
玉塵落碾雷聲殷  
瓊乳滿甌雲影橫心入蓬萊仙路杳  
書傳諫議夢魂驚  
却疑說法神天坐散亂空花雙眼明

張壁

字景辰陳留人

嘉禾

城樓倒影落湖波湖上風帆鏡裏過歸客自炊菰米飲  
小娃爭唱竹枝歌梭頭艇子輕於葉雪色沙鷗白似鵝  
此地將軍戰時血春來丹漬蘚痕多

橫溪

扁舟東來歌扣舷四顧雲水心茫然蛟龍見窟不敢唾  
星斗滿身如在天打鼓賣魚江雨歇看山濯足溪風顛  
解衣典取酒一石醉伴忘機鷗鳥眠

朱芾

字孟耕雲間人號滄洲生

寄張子政

野政老人隱者流清溪遶屋似惡溝自編蒲葉作素簡  
時瀉松花洗玉舟仲連未遽蹈東海孺子還復栖南州  
別來清事想不廢詩成應畫李營丘

沈伯脩

懷鐵雅先生

烽火南歸鬢未華草玄亭在水東家綠簣新長參差玉  
瑤樹能開頃刻花坐按小娃歌白苧醉呼稚子整烏紗

麟洲別業清無暑翠盎時浮五色瓜

釋守仁

寄友人歸上洋

四月南風吹白沙春江遊子思無涯  
讀書未築樵東舍送客先歸海上槎  
萬里黃塵悲戰馬滿城紅雨亂飛花  
傷心不折湖邊柳更待重來駕小車

柯九思

飛龍亭

謝安墩上新亭好玉斧鑾旌紀昔遊五色曾瞻天子氣  
六龍俄起帝王州元戎談笑收京闕阿閣論思侍冕旒  
一臥滄江今白髮鼎湖雲斷使人愁

送黃鍊師

橘皮書壁走龍蛇池上芭蕉又見花北闕恩承新雨露  
西湖光動舊烟霞春風日長玄都樹秋水星回碧漢槎  
修月功成三萬戶蕊珠宮裏誦南華

周之翰

石碁子

碁子灣頭千丈渦  
沈星出世恐無多  
自然黑白分明見  
天巧團圓不用磨  
本與閒人消日月  
却教平地起風波  
不如煮作仙人供  
更覓山中爛斧柯

王澤

寒食有感

天星夜落水犀軍  
又見吳宮走鹿群  
睨睨金湯徒自困  
倉皇玉石竟俱焚  
將軍只合田橫死  
國士曾無豫讓恩

風雨明年寒食節麥盂誰上太妃墳

釋原本

字立中

寄杭州許萬戶

八月錢唐蜃氣紅  
守江諸將謾論功  
遐荒未盡歸王貢  
南海初聞奉使通  
帥閫旌旗低白日  
山城鼓角起悲風  
不須弔古追前事  
秋草離離滿故宮

釋靜慧

字古明

題天馬圖

八尺飛龍十二閑飄飄來自岢嵐山曾陪八駿崑崙頂  
肯逐羣雄草莽間落日倒行悲峻阪西風苦戰憶重關  
拂郎可是無新貢天步于今政險艱

沈鉉

字文舉

趙松雪故宅

故國西風王氣銷珊瑚玉樹半漂搖曾瞻東壁迴天象  
故著南冠續漢貂第宅空存森衛戟墨池乾盡尚蘭苕  
高情一去風流遠夢憶簫聲第幾橋



釋志瓊

字蘊中

深秀亭暮春述懷

空庭雨濕聚華茵  
回首東風憶遠人  
玉砌香銷行跡斷  
雕闌吟徹別愁新  
樓臺半是前朝景  
桃李都承舊日春  
歸燕多情還戀主  
銜泥雙拂畫梁塵

俞鎬

字孟京雲間人

寄董良用先生

東望雲山翠且重  
烟波咫尺是婁淞  
十年為客荒三徑

百里憐君住九峯把酒每懷彭澤令放歌甘作鹿門農  
闔閭風景渾非舊愁聽寒山半夜鐘

董佐才

細柳營

應試

棘門灞上皆兒戲只數條侯細柳營天子徐行恩至重  
將軍不拜禮非輕渭城萬樹春陰合漢室千年塞寇平  
他日從知可堅臥豈愁奔壁有吳兵

張守中

字子政

次韻堵無傲中書宣使過維揚二首

鶴鳴雨後淡雲天三月花飛水滿川  
暖吹欲迷沽酒館春城還泊載書船  
新詩句法傳江上壯歲功名到日邊  
瀟灑使君懷抱濶相逢又喜五門前

扁舟古渡柳陰陰移近蕪城日未沈  
水上樓臺人喚酒花邊簫鼓客留心  
一宵烟雨迷清夢萬里江山入壯吟  
還憶帝鄉春色滿碧桃花暖五雲深

顧彥

字孔文

無題二首

灤河開國世還淳  
職貢梯航罔不賓  
珠樹木難炎土物  
紫駝黃鼠朔方珍  
雕題火老鍤金珥  
漆齒夷王冠玉麟  
荒服年來朝貢絕  
包茅責入竟何人

百年盛業自天開  
化洽周南陋漢才  
朱鴈每從東海獲  
白禽還自越裳來  
繡衣玉斧嚴丹陛  
袞冕桓圭列上台  
政典有餘戎備畧  
秋風滿地獨興哀

張昱

字光弼 廬陵人

寄王梧溪

仙舟曾記過南堂  
鳴鳥高梧日正長  
胡蝶重來春夢覺  
牡丹欲盡燕泥忙  
當時賓客知何往  
此日音書或漫忘  
猶有白頭王粲在  
獨將詞賦動江鄉

買閭

字兼善會稽人

感懷

關河北望正愁人  
且復雲間托此身  
一片丹心昭日月  
數莖白髮老風塵  
箕裘嗣世慚無子  
菽水承顏喜有親

自是故園歸未得杜鵑啼破越山春

題葉隱居雪蓬

朔風吹雪滿溪灣一葉憑虛獨往還  
擊楫正思歌玉樹舉頭驚見失青山  
曉窮滄海模糊外夜泛銀河浩蕩間  
笑殺當年韓刺史苦寒騎馬度藍關

葉杞

字南有號漪南京口人

楊文舉先輩辟宣政院掾

西方象教被中華寶幣絲綸示寵嘉  
冠冕總依金粟影

香雲常近紫薇花日長臺院機仍暇春滿湖山跡未賒  
獨喜掾曹儒自守只將經史載三車

謝楊建德過舉

艱危懷抱一時開忽拜黃堂手札來鴻鵠風高羅刹渡  
燕鶯春滿客星臺親聞政爾嗟垂白清議無煩到不才  
聞說棠陰多樹德倚樓長詠北山萊

輓樊參政

公諱執敬字時中濟寧之鄆城人由丁卯進士累官

拜侍御史轉江浙省參政至正壬辰徽寇陷杭城武臣野遁公單騎前驅戰死於歲寒橋下

中臺侍御新參省南紀妖星正合圍主將向來推右族漢人那得預戎機戈麾落日先身死雲慘青山未骨歸惟有鄂王雙宰木歲寒汜水遠含輝

輓楊負外

公諱乘字文載濟南人由參議府掾累陞江浙省負外郎徽寇陷杭朝廷以大臣失守罪罪公既依故人



章彰德居龍江至正丙申今太尉時稱王中吳遣使  
聘焉公笑曰吾豈事二姓遂經死

太息南冠久陸沈百年風節見于今王嘉不赴公孫詔  
朱泚寧移秀實心遼海有靈歸夜月荒原無樹著秋吟  
不知江漢新降鬼曾憶天朝雨露深

輓楊左丞

諱諤勒哲字世傑廣西之武岡人兵興率苗不應募  
英慄勇悍所向多克官至海北道元帥江浙省丞相

達實公義之承制拜公參知政事時淮張氏稱王中  
吳勢卷浙右公振師復省治保嘉禾既張氏降江浙  
省奏拜張太尉淮南平章行樞密知院公加本省左  
丞越二年張發兵掩襲丞相陰拱竟不之援公嬰城  
閉守且斬賜馬享士卒諭以大義拒戰十日遂經死  
弟已延同死之幕下負外郎王國賢嘗直言侵丞相  
丞相殺之

馬首星河半壁天東南保障豈徒然越侗新拜中朝命

吳會重頒至正年故土未歸師竟老長城雖壞節能全  
碧梧池上蹲孤鳳他日應慚義鶻篇

輓余忠愍公

公諱闕字廷心青陽人明經登癸亥榜同進士第二  
人兵興以淮西宣慰使出鎮安慶時寇起上游遠近  
瓦解郡當淮江衝要公堅守六年日夜禦戰朝廷聲  
聞不通芻餉道阻公經心緯思賞罰信號令明與士  
卒同甘蓼由是俘獲莫計卒以援不至食且盡城遂

陷公偕妻子盡投水賓從偏裨同死者六百餘人

淮江風急鳥蛇空特立旌旄板蕩中萬里孤懸班定遠  
滿城忠烈漢臧洪瓊林星漢回文運皖國雲山誓武功  
尚憶綉衣行部日遺民揮涕浙河東

吳哲

字子愚

讀文丞相吟嘯集

忠臣就死古來多丞相謀生脫網羅要為春秋明漢賊  
忍題風絮泣山河綱常道在詩千首骨肉情長賦六歌

留得精誠等光嶽奸魂佞魄奈愁何

丙申三月從平章左公總戎臨安過南山訪楊鐵厓先生時谿漲馬不克渡延佇口號

旂旄晨趨十萬軍衛青幕府事紛紛臥龍不遠滄溟窟  
走馬來看館閣文春過名山花亂落雨晴飛瀑路難分  
先生高伴洪厓嘯獨向溪邊望白雲

丁未二月廿五日西江有感

姑蘇臺上白雲飛城郭人民半是非方寸有時忘七筋

夢魂無夜不庭闌從來北地音書絕漫恐還家骨肉稀  
孝道未全那敢死暗將孤淚濕征衣

小孤山

俗繆為小姑上有  
聖母廟像在焉

中流玉卓迴無羣大海雄藩自楚分

宋高宗大書顏其  
厓曰海門第一關

絕頂薰香常蔽日靚妝樓閣不藏雲孤根閣直龍棲宅  
亂水平鋪鳥篆文我欲維舟明月裏為神鼓瑟候湘君  
題豫章銘孝紀所藏米元暉畫卷時久不得東吳

消息

淞陽之君何處尋  
展卷聊復慰幽心  
門前罵去花事畢  
屋裏雨鳴江樹深  
微茫漢月墮燕草  
窈窕吳歎成越吟  
南宮仙人獨不死  
白雲歲歲蒼山岑

遣興答李道源

徒步何憂髀肉消  
賦歸無待楚辭招  
摩挲藥籠三年艾  
濩落人寰五石瓢  
簑笠雨淹滄海釣  
斧斤晴趁白雲樵  
遊仙枕上西池月  
轉覺東華曙色遙

七夕漫成

烏鵲梁成歲一過靈風此夕度鳴珂鸞釵再合駢金股  
牛渚重來失素波巧落人間徵應少愁歸天上別離多  
迴車身黥無消息香霧雲鬟奈爾何

寄題王梧溪先生烏溪隱居

有幽貞谷  
濯風所

陸海羈塵竟不開早從人世得天台扶藜洞口晴雲出  
濯髮林端夕吹來述作才長勞汗竹謀謨壽在潤生苔  
喜聞家政傳諸子十畝黃雲總酒材

和張拱辰輩中秋傳波韻



頗怪清狂廢客眠  
桂花飛雨落瓊筵  
宮壺漏轉烏啼樹  
仙佩聲微鶴上天  
載月輕槎渾汎葉  
吹雲長笛總如椽  
百年高會誰能識  
一為新詩作浪傳

王嘏

字伯純

送秦東海法師遊上清

為愛仙山絕世氛  
蒼苔寂寞路難分  
白羊歲久渾疑石  
瓊樹春深半是雲  
洗藥泉香龍蛻骨  
吹簫臺迴鶴成羣  
隱文秘訣無人識  
我欲相從一問君

寄倪元鎮

赤水丹山隔兩塵，麻姑書信莫辭頻。  
久知鴻寶飛騰術，獨許青雲磊落人。  
賓戲能消春晝永，茗香聊試石泉新。  
東風回首松陵道，重擬攜書與卜鄰。

送錢思復提學歸曲江舊隱

湖海多年鬢欲銀，一官依舊廣文貧。  
淹留濁世惟懷土，寂寞青衫不受塵。  
酒伴凋零元自少，詩筒來往莫嫌頻。  
曲江春水應無恙，安得相從與卜鄰。

林洵

字季文天台人

送顧謹中赴國學二首

洪武初年監學開大明天子育英才不徒貞觀儒風盛  
載喜新羅子弟來佩影三千環壁水書聲日夜徹蓬萊  
君今此去文名著行見奎光近上台

春來四海喜昇平花氣浮香日月晴儀鳳舞庭為世瑞  
神駒脫御向人鳴英年好試春秋學美譽曾傳月旦評  
聖主求賢端為國虎頭不負有雲仍

陶宗儀

字九成丹邱人

徵懷樓為章處士賦

樓倚青霄護赤闌時時登眺頻人寰窓含虛影東西泐  
坐挹清暉四五山古道寂寥惟自適野情蕭散寄餘閒  
塲埃迴隔圖書祕好約游仙共往還

送殊上人游武林聽法

湖上諸峯入望青尋幽歷歷記吾曾半蓬殘雪溪南別  
一錫閒雲雨後登時向定回聞戒法便從悟處剖宗乘

明年二月還相迓且說傳來第幾燈

胡謙

字彥恭雲間人

題張子信雍冀紀行詩集後

有子早傳丹桂芳明時上國快觀光  
平生學業真無負弱冠聲名獨擅場  
清渭水流春汨汨太行山色曉蒼蒼  
此行足慰平生願拾得驪珠滿錦囊

大雅集卷六

欽定四庫全書

集部  
大雅集卷八

詳校官中書<sub>臣</sub>丁榮祚

助教<sub>臣</sub>常循覆勘

總校官知縣<sub>臣</sub>楊懋珩

校對官助教<sub>臣</sub>卜維吉

謄錄監生<sub>臣</sub>張同履

欽定四庫全書

大雅集卷七

元 賴良 編

李孝光

字季和號五峯永嘉人

鑑湖

賀家湖裏見秋風放翁宅前東復東  
兩邊雲樹忽遠近十里荷花能白紅  
行人濯足銀河上越女梳頭青鏡中  
我欲張帆上南斗扶桑碧海與天通

丁復

字仲容號雙梅老人天台人

寄茅山黃京師

飈輪峰頭鶴下空華陽洞口百花紅  
長林藥草無人識上界蓬萊有路通  
爛醉前年春作客頗憐去日老成翁  
丹砂不遣來城市故著題詩寄葛洪

送僧之浙東

我家浙東海水西危峯高上作天梯  
蛇喉尊者秋歸洞虎背禪師夜過溪  
曉日桃花山更好春風藥草路多迷



何堪相送寒江上短髮頻搔不更齊

張天雨

字伯雨號句曲外史錢唐人

答鐵雅先生二首

弄水摘花春可憐風雨倦尋茅步船我家南塢有靈石  
龍井西頭無杜鵑野鶴乳雛畏人過弱柳委地趁蠶眠  
子雲胡為甘寂寞後世何人知太玄

黃篋樓中但飲酒樓下長溝鳧雁多灣頭橋斷迷青草  
閭處風來生白波饒奴竟煮脫棚笋老魚戲唼如錢荷

詔書寬大來海角河北飢民爭倒戈

錙若水

字澹齋澄江人

因觀張仲舉張景亮和盧廷舉詩次韻

迺翁同醉鬱輪袍花老玄都幾樹桃湖海交情三世舊  
兒孫文彩五雲高石門仙去春如夢翰苑詩來句入騷  
山月江風無盡興酒瓢何日為重操

倪瓚

字元鎮號雲林子昆陵人

送賴善卿采詩

陳詩昔在周盛日刪詩已是衰周餘祖述孰能加四始  
研窮我已後諸儒嗟子用意亦勤厚聽音知政非迂疎  
願排閭闔獻采錄坐變四海如唐虞

題本立中上人雲山望松圖

西望雲山何處亭鶴歸松枯秋冥冥上人不廢蓼莪句  
山室長書貝葉經未應佛法外孝弟定感仙手鐫碑銘  
過家上冢世代隔慟哭亭前蘿月青

次朱孟辨見寄韻兼東立中蘊中二大士

江水空清好卜居會衝春雨過平湖雲山欲覓無聲句  
花果誇傳沒骨圖莫倚陸機曾入洛最憐張翰獨思吳  
本瓊二士平安否應共清吟對酒壺

顧瑛

字仲瑛號金粟道人崑山人

唐宮詞次鐵雅先生無題韻十首

天寶雞坊寵賈昌宮中蝴蝶滿釵梁錦裯晝浴天驕子  
絳節朝看王大娘芍藥金闌開內苑蒲萄玉盞酌西涼  
月支十萬資臙粉獨有三姨素面粧

蓮花池畔暑風涼玉竹迴文寶簾光貪倚畫屏看翡翠  
誤開金鎖放鴛鴦輕綃披霧誇新浴墮髻敲雲銜晚粧  
笑指女牛私語處長生殿下月中央

五色卿雲護帝城春風無處不關情小花靜院偷吹笛  
淡月閒房背合箏鳳爪劈柑封鈿合龍頭瀉酒下瑤罌  
後宮學做金錢會香水蘭盆浴化生

龍旂孔蓋擁鸞幢步輦追隨幸曲江鳥道正通天上路  
羊車直到竹間窓桃花柳葉元無恨燕子鶯兒各有雙

中貴向人言近事風流陣裏帝先降

祕閣香殘日影移燈分青玉刻盤螭琵琶鳳結紅文木  
絃索蠶繅綠水絲金屋有花頻賭酒玉杵無子不彈碁  
傳宣趣發明駝使南海今年進荔枝

近臣諧謔似枚臯侍宴承恩得錦袍扇賜方空描蛺蝶  
局看雙陸賭櫻桃翰林醉進清平調光祿新呈玉色醪  
密奏君王好將息昨朝馬上打圍勞

號國來朝不動塵障泥一色繡麒麟朱衣小隊高呵道

粉筆新圖徧寫真寶雀玉蟬簪翠髻銀鵝金鳳踏文茵  
一從羯鼓催春後不信司花別有神

五王馬上打毬歸贏得宮花獻貴妃樂送閤門邊奏少  
禍因臺寺諫書稀侍兒隨幸皆頒紫骰子蒙恩亦賜緋  
姊妹相從習歌舞何人能製柘黃衣

新製霓裳按舞腰笑他飛燕怕風飄玉蠶倒臥蟠條脫  
金鳳斜飛上步搖雲母屏前齊奏樂沈香火底坐吹簫  
只因野鹿銜花去從此君王罷早朝

宮衣窄窄小黃門  
躑躅初開腸縹緲  
盆夜月不窺鸚鵡冢  
春風每憶鳳凰園  
愛收花露消心渴  
怕解金呵見爪痕  
只有椒房老宮監  
白頭一一話開元

評曰十詩綿聯縹緲麗消得錦半臂也

郊韶

字九成吳興人

和報復元秋興

大星出海芒角稀  
新月隔林光景微  
空山無眠雞犬靜  
獨樹忽驚鳥鵲飛  
已喜朝廷寬賦斂  
側聞南國尚戎衣  
釣竿早晚落吾手  
日日放船來小扉



鄭蒙泉鍊師子午谷圖

子真今住子午谷  
迺在蛟門西復西  
繞屋長松落晴雪  
倚天絕壁立丹梯  
春回大壑三芝秀  
月滿空山一鶴棲  
歸去看圖望瀛海  
定應沐髮候天雞

郭翼

字義仲 崑山人

送人遊武當山

武當諸峯何壯哉  
大朶小朶青蓮開  
玄聖中居天地戶  
赤日下照金銀臺  
神龜六眼電光走  
山鬼一脚雲頭來

道人再拜望北極應帶滿身星斗迴

懷鐵雅先生

揚子十年官不調湖山不負謫仙才  
洞庭鐵笛龍吹得  
后土瓊花鶴寄來  
車子看花將一輛  
雪兒勸酒扣連臺  
時時對客理弦索  
月色羅衫小袂裁

評曰人呼老郭為五十六以其長于

七言八句也觀此二詩可知

成廷珪 字元章維揚人

送張思廉

讀書不逢萬乘尊挾策肯傍諸侯門  
放歌蘇臺晚山碧濯足太湖秋水渾  
千金未易買駿骨一飯何足哀王孫  
風塵拂衣且歸去高臥桐江雲水村

顧逖

贈張玉笥

張公學武萬人敵玉笥讀書三十年  
未請尚方誅佞劔且營東海買山錢  
異鄉感慨秋風雁故舊徘徊雪夜船  
好作黃金臺上客于今郭隗在雄燕

贈馬敬常

戎馬紛紛北渡河將軍勛業尚蹉跎十年鬢髮時看鏡  
萬里風霜夜枕戈知已有如齊鮑叔得君無復漢蕭何  
錦衣未解歸鄉國南越封王屬尉佗

茅穀

字子剛廣陵人

次丘克莊韻

弱流瀛海三千里明月揚州廿四橋雲擁黿頭山在望  
風吹鶴背路非遙參差瓊館珊瑚樹縹緲紅樓碧玉簫

二老往來人所羨欲憑畫史寫生綃

次成元璋韻

淮南故老凋零盡獨有先生是俊髦到處談詩聽夜雨  
長年作客典春袍山雲墮地忽九朶湖水鑑空無一毫  
即景懷人思何限誦君佳句課兒曹

高志道

送俞子俊調平江府判

耆童羅拜長洲上正是官船到岸時流水落花西子宅

故家喬木范公祠愛蓮池上留嘉瑞種樹雲間動去思  
素壁高堂應看畫公餘還有寄來詩

次楊鐵史飲西湖亭韻

惟知湖上新亭好百歲襟懷一笑開今日共憐吳下客  
與君且盡掌中杯夕陽半壁白鷗過秋色滿簾鴻雁來  
勲業未成頭欲雪幾時重築釣魚臺

贈程彥明

不見瑤花近十年月明無復看神仙已知陳迹俱長往

欲賦閑情絕可憐茅捲秋風誰補屋波乾滄海忽成田  
故人邂逅徒興感且覓江南買酒錢

陳堯道

字宗遠因所居自號竹林處士嘉禾人

松瓢齋為王好問賦

身外纖微皆長物一瓢飲足寄蒼虬壺中日月縣林表  
天上匏瓜下礪幽器大從來成濩落時危那復事沈浮  
只憂尚渴陶唐化未放先生學許由

贈穆爾古蘇

小范胸中有甲兵檀公身後壞長城大星墮地中軍愴  
白馬憑潮霸主傾碧血不隨金石化丹心長貫斗牛明  
會稽尚與浯溪並誰與磨厓刻姓名

李復

字道原天台人

題華亭監縣奉御酒省親卷後

昔年司鑰奎章閣父守芙蓉江上城問寢不忘人子事  
乞歸深荷聖恩榮親庭喜動五綵服御酒香浮雙玉罍  
今日南來花滿縣累茵列鼎重闕情



贈張萬戶征閩凱還

瘴雨蠻烟遠蔽空只將談笑蕩群兇  
旌旗後捲妖星殞  
鼓角秋高殺氣雄已喜張良還灞上  
更須龔遂守關中  
凱歌聲動天顏喜金虎三珠擬報功

鄭洪

字君舉永嘉人

白塔寺

江山襟帶尚依然王氣消沈已百年  
八葉龍孫東入海  
六宮綵女北歸燕銅駝荊棘西風裏  
石馬莓苔落照邊

玉袖游魂飛劫火五陵嘉樹不啼鵲

浙江亭

海門潮水貫長虹天際山形隱伏龍  
南省官曹終日醉西陵烽火隔江紅  
黃金不鑄岳武穆青史直書劉巨容  
蕭瑟江南哀不盡庾郎詞賦若為工

馮以默

字淵如號彈鋏生雲間人

雲山樓為楊竹西賦

絕海高樓吳下聞金山秦山春日曛  
仙人玉笙下紫鳳

神女螺鬟洗白雲金碧芙蓉開錦繡蛟螭烟霧濕秋文  
上頭三月東風急點點飛花入舞裙

秋日登樓感興

秋滿江樓四面開樓頭風緊鶴飛回天空西北峯巒繞  
日薄東南鼓角哀紫蓋黃旗歸象緯越羅楚練照輿臺  
凭軒無限淒涼意歎問平安信使來

張樞

字夢辰號書巢生陳留人

秋興二首

百戰關河血未消將軍誰是霍嫖姚  
中原板蕩悲周室西楚紛披屬漢朝  
甲帳珠簾非昨日玉樓金屋麗層霄  
兵麾滿眼歸無處愁絕秋風柳萬條

天上旌旗絢彩霞人間鼙鼓雜鳴笳  
禍延江漢三千里殃及城門百萬家  
萱草有情低傍竹棠梨無主亂開花  
掉頭歸去秋風晚爭似鷗夷一釣槎

錢元方

字彥直雲間人

寄李紫賓

謫仙今住五茸西醉後嬾披宮錦衣天上玉堂無夢到  
中山書艇載鵝歸白雲滿屋詩連軸大泖當門鱸正肥  
安得造君清隱處紫簫吹月轉山扉

題謝氏仲允一掬泉

石湖之渙有甘泉一掬清泠絕可憐金鯽跳波明月上  
彩雲浮石紫苔連流杯夜醉雲松伯洗筆春留鐵笛仙  
翠閣紅闌誰是主東山太傅子孫賢

吳穀

字近仁富陽人

題君山吹笛圖

洞庭帝子罷張樂  
銅龍夜嘯秋冥冥  
老蛟起舞珠宮月  
白石亂殞銀河星  
赤壁孤舟泣嫠婦  
蒼梧別淚啼湘靈  
鈞天寥寥萬籟息  
君山一髮烟中青

鄭采

字季亮永嘉人

送姚子章之浙東帥掾

南紀四明維浙左  
孤城百雉接風濤  
越裳客去得犀角  
日本船來看寶刀  
元帥旌旗開外閫  
掾郎才略服諸曹

帳中羽檄何須草政愛夔州詩法高

送果上人游雁山

雪消山色漲東州最好天台雁蕩游  
背負青天緣鳥道面承飛雨看龍湫  
深春林麓多金剎落日江湖自白頭  
石上玉芝應拾得念吾無物可銷愁

尤存

字以仁吳郡人

送李紫簣歸澱山草堂

積玉溪頭水拍天草堂只在澱山前  
鳴鳩啼鳥青春裏

金匱山房集卷七  
古木疎篁落照邊  
仙客近傳餐玉法  
故人時送買山錢  
相逢未盡一杯酒  
陸相祠前又發船

釋曇噩

字夢堂四明人

題杭州報國寺儀鳳軒

濤江之上青崔嵬  
山勢遠從天目來  
錢氏豈能當王氣  
郭生端復是仙才  
光搖海旭九苞動  
影拂雲霄雙翅開  
為我翩然覽輝下一軒  
著此亦宜哉

釋宗衍

字道原中吳人



春日西湖懷古

錢唐父老眼看天破國猶能話昔年江草忽嘶關北馬  
風帆不返海南船空陵落木無人掃廢苑餘花只自妍  
此日西湖回白首功名若箇在凌烟

秋興

一別空山舊草亭衣裳五見點秋螢沙沈短艇餘菰米  
苔臥長饒老茯苓弱水蓬萊那可得瞿塘滟澦不須經  
歸帆早晚吳波裏嫋嫋涼風望洞庭

釋梵琦

字楚石四明人

送康上人之京

花隔深宮柳拂牆少年仍值好春光  
風飄玉珮縈雲曲日射金爐夾道香  
一色樓臺天蕩蕩九衢人物海茫茫  
篋中舊筆今零落猶記題詩鳳沼傍

釋元本

字立本丹丘人

富春歸隱圖為鐵雅先生賦

小橋流水隔紅塵亦有漁郎解問津  
要路只聞收壯士

好山還許住閒人每思李愿歸盤谷獨愛嚴陵老富春  
便擬采芝歌隱曲白雲紅樹漫為鄰

泊雙井亭有感

涼颼微動水雲收鷗鷺無聲泊處幽露落梧桐雙井冷  
月明砧杵萬家秋貪歡盡醉吳姬酒長往誰同范蠡舟  
最憶多情鄭司馬琵琶和淚上江州

送趙僉憲還司

執簡曾趨玉几傍繡衣猶帶御爐香九重哀詔蘇民瘼

金史四  
卷七  
一道激清肅憲綱興學已尊周禮樂好賢多紀漢文章  
鯨濤已息豺狼伏歸騎嘶風滿路霜

釋智寬

字裕之號雲海吳中人

送王尚書轉漕還京

白髮蘭臺老鄭崇野人爭識舊乘驄青冥斧鉞來南國  
碧海樓船駕順風夜指星樞天直北曉瞻雲氣日華東  
趨朝正及端陽節細葛承恩出漢宮

送王景華道士之京

羽客思歸尺五天雙鳬直上紫雲端玉簫聲徹春空迴  
寶劒光浮夜月寒夢入瑤臺香冉冉步趨青瑣佩珊珊  
奉顏重進長生籙南極星迴太乙壇

釋永彝

字古鼎雲間人

### 南屏雨中

五月雨聲連六月南屏雲氣擁柴扉林巒有穴山精出  
巖谷無人石燕飛詩句偶從行處得家鄉多在夢中歸  
曉來杖策湖頭去春水溶溶沒釣磯

李節

字處約 穎上人

寄唐伯順

鶴林宮裏故人遠  
謝傳宅前秋水多  
烏帽吟餘還放棹  
黃庭寫罷更籠鵝  
平頭奴子金盤露  
皓齒佳人白苧歌  
不得相從渡三泖  
月明清夜奈愁何

和高以敬韻

別君九見歲華新  
邂逅相逢亦可人  
靈鷲峰前看飛瀑  
鶴林宮裏度殘春  
時時送客傷南浦  
夜夜占星對北辰

莫話當時舊游處落花芳草倍傷神

徐津

字仲盟江陰人

哀李江州

強敵西來把漢旌潯陽烽火照江明朝廷重鎮推虞詡  
風雨孤臣失杲卿戰哭幾家思舊尹鬼兵長夜護空城  
王師百萬知何地春草春波獨愴情

客懷

白雲回首暗巫門綠髮蒼蒼碧眼昏亂後情懷千日醉

金少府  
故交文物幾人存  
秋深狡兔先營窟  
日落歸鴉尚識村  
樓上風高笳鼓急  
楚鄉多有未招魂

釋曇墳

字大章天台人

送王宗禮尚書趣運還京

轉海雲濤萬里賒  
長風指日望京華  
南州已入諸侯貢  
北極初回奉使槎  
內燕宮花迎馬酒  
御溝官柳拂龍沙  
從容好奏安時策  
遂見車書混一家

次韻答慈元恕



茅屋住在清江西  
瀟洒渾無俗客過  
流水自懸春藥碓  
落花閒度煮茶鍋  
不耽玄石三年酒  
只賦梁鴻五噫歌  
退食歸來塵事少  
舊游回首隔風波

陸炯

字晦叔號書蓬漫郎吳下人

送鄭德和檢討之融水縣尹

清朝才子多如雨  
之子聲華重講筵  
天上玉堂辭聖主  
嶺南花縣得英賢  
蠻烟秋暗枕榔洞  
瘴雨春深茉莉田  
莫道衡陽無過雁  
好題書寄五雲邊

達漣化

字仲困號龍海龍城人

讀班叔皮王命論

丹鳳黃龍降自天玉皇金鼎在遺編漢皇未必從陳勝  
秦帝何曾愧魯連堯聖善推行揖讓啓賢能繼事相傳  
叔皮宏論終天在好為群雄一再宣

鳳凰山望朝日

滄海全吳當百二坐臨溟渤鬱陶開日含金霧天邊出  
潮捲銀河地底來雲淨定山浮砥柱天高秦望見蓬萊

東南檣櫓年來少獨向江頭一愴懷

張以文

雲間人

秋懷

草閣柴扉抱鶴汀石田老圃事躬耕  
函關望氣青牛駕秦礪書功白馬盟  
漢主山河千古在伍王潮汐幾時平  
坐看落日楓林晚厭聽江城鼓角聲

劉儼

字敬思錢唐人

南屏別墅圖

竹裏深藏聽雪齋花邊小築御風臺雲嵐倒影水天迴  
蒲葦有聲山雨來內史幽情觴詠樂右丞別業畫圖開  
何時許我游真境野色橋邊踡紫苔

舟中漫興

青天縹緲吹雲衣碧水顛倒插翠微三家五家村舍出  
一點兩點沙鷗飛柳枝裊裊拂過艇苔花斑斑生釣磯  
風塵不到是樂土故人莫怪入城稀

丘民

字克莊邦城人

題柯敬仲竹

奎章閣下文明日  
徧寫琅玕寄遠游  
踈雨夜啼湘女泪  
蜚鸞朝下羽人丘  
月移簾影金閨夢  
風度簫聲玉宇秋  
幾見畫圖憐往事  
碧雲凌亂使人愁

和顧仲瑛平湖草堂詩韻

十二行窩總是春  
平家湖上草堂新  
養來白鶴須教舞  
浴出花驄不受馴  
桂樹謾歌招隱士  
鹿門今屬姓龐人  
錦囊合貯詩千首  
聲價流傳海內民

送友人入杭

又隨南雁過錢唐不道并州是故鄉  
江上秋風蓴菜美山中春雨石田荒  
杜陵老去寧忘蜀江總歸來不是梁  
欲采芙蓉贈君去錦雲零落倍淒涼

沈震

字伯脩華亭人

題春暉堂

萱草花開滿北堂繡簾垂地護清香  
晨羞進饌冰鱗美夏扇迎風暑簟涼  
煬煬春暉生寸草澄澄壁月霽孤光

瑤池宴罷蟠桃熟白玉壺中日正長

錙堧

字小齋江陰人

送曹德輔都事督海運

畫省郎官親海漕龍驤風熱綵颿飛銀河天闊開黃道  
析木星高近紫微漢室重看糧餉足邊庭今見欵書歸  
定知劉晏朝回日秋水先生御賜衣

送徐性全歸東州

三月江南杜宇啼鶴坡風暖水平堤故人別酒交情重

游子歸舟客夢迷  
謝傳堂前春樹合  
越王臺下暮山齊  
到家依舊多新咏  
棣萼萱花取次題

送李象賢歸省

秀拔赤城山水奇  
吳松江上久相知  
每懷衣錦還鄉志  
猶憶擔簦渡海時  
喬木百年存閬闕  
高堂重慶享期頤  
莫因猿鶴頻留駐  
天上風雲已有期

張經

字德常京口人

次鐵雅先生韻



春風滿袖折花回高臥雲間百尺臺天上賜袍香霧濕  
河東獻賦日華開頻煩太守高軒過屢見元戎小隊來  
我欲將車侍親去綵衣花底學提孩

全思誠

字希賢華亭人

送黃仲珍會試

唳鶴灘前凍雨收賓筵載詠鹿呦呦右文天子春秋富  
勸駕諸侯禮數優日下五雲生北闕天邊一鶚起南州  
遙知入射丹墀策象管翩翩思不休

寄虞彦高縣尹問疾

陶令西山去養痾秋來病減幾分多千年松下得琥珀  
萬壑雨餘生薜蘿有客饋魚供野酌何人擊竹和樵歌  
長吟不盡相思意矯首霜前一雁過

邵思文

字彥文

感興二首

聞說昭王未築臺此生空抱濟時才青衫外史江南老  
白髮中官海上來自信文章追董賈可能游俠效鄒枚

春風處處堪腸斷莫上層樓看劫灰

鳳凰山下野花開又見東風燕子來主將深居營玉壘  
王官行樂載金罍裂麻解使陽城哭作賦徒令庾信哀  
多少高人隱屠釣尚推門第不論才

白塔寺感懷

浮屠千仞獨崔嵬宮殿巍巍盡劫灰玉樹已消龍虎氣  
青山長繞鳳凰臺城頭戰鼓連雲起沙觜殘潮帶月迴  
萬里英魂歸未得不思泥馬渡江來

成廷珪

字元章

贈綾錦墩隱者錢慶餘

手挂烏藤五尺長  
山行時著古衣裳  
缺文自補雲間志  
賣藥多收海上方  
茆屋秋風催釀秫  
錦墩春雨看移桑  
野人笑指長安路  
馬足車塵有底忙

袁舉

字仲微

秀峰懷古

湯池壁壘讓王城  
奴隸猶聞至德名  
差闕久摧神木柱

胥祠仍薦血毛牲空山落日狐狸出荒徑秋風麋鹿行  
橫槩豪吟竟何在水流東去寂無聲

袁藏用

字顯仁

贈道士

十二靈鼇戴五峯道人家住蕊珠宮蒼龍出匣劍氣紫  
朱雀在鼎丹光紅夜泛星槎游瀚海早朝天闕步剛風  
羨門相遇知名姓言在東華碧簡中

釋至瑀

字蘊中

次李菊莊韻

十二行窩取次游道人處處任風流  
草衣疎散乾坤老  
蓆帽飄蕭湖海秋  
太白狂歌沽酒館  
元龍高臥讀書樓  
相思兩地同明月  
南北誰云異馬牛

黃常

題海雲樓

見說飛樓高入天  
凌雲東望海如川  
乾坤影浸三山樹  
吳楚青連萬古烟  
鶴背笙簫天籟發  
龍噓簾箔夜珠懸

從遊擬答登臨願試上慈航一問禪

書懷寄陳參軍

雙瞳澄徹紫髯飄  
早沐河陽遠見招  
赤羽旗前催草檄  
青油幕底臥吹簫  
大堤花鳥還應好  
南徼烟塵苦未消  
羨子匡時足經濟  
餘波幸見及漁樵

俞庸

字子中號凝清齋

堵無傲討賊獲功仕金壇縣尹久別無信作此寄之

春入椒盤歲復除故人不寄一行書虎頭年少方投筆  
鶴髮慈親正倚閭鵬鸞雲霄揚羽翮犬羊巢穴悉丘墟  
丈夫出處皆前定莫向明時較疾徐

次韻陳伯昂見寄

關河瑟瑟暗烽烟矯首遐觀獨悵然徒見舟車勞驛使  
未聞山澤訪遺賢參橫古塞初寒夜霜滿征衣欲曙天  
自笑儒冠只如此窮通何必卜筵筭

病起口占



憶昔辭家塞北遊，朝來何事怯新秋。  
床堆藥裏塵侵几，風靜書窓月滿樓。  
伏檻長鳴憐老驥，引杯含淚惜吳鉤。  
旌旗明滅西城路，落日長烟起暮愁。

董成

字性存嘉禾人

送俞子中之弋陽尹

出宰江東試左轡，津津喜色動椿萱。  
大朝恩澤承三世，命服光華萃一門。  
壯歲風雲誠有待，秋空鵬鷃正高鶩。  
弋陽父老郊迎久，預播清聲已可論。

贈楊山居太史

曾懷荆璞詣天闕  
雨露恩深賜佩環  
玉筍筵班躋鳳沼  
金閨通籍侍龍顏  
尚書聽履星辰上  
太史蜚英翰墨間  
厭直承明動歸興  
錦衣光彩照湖山

送俞子俊麗水巡檢

為官當作執金吾  
膝上須橫丈二殳  
會見黑頭我獬豸  
試看赤手縛於菟  
醉歌擊碎玉如意  
獵較射空金僕姑  
眼底狸鼯俱掃迹  
冑中有策致唐虞

楊達

字道夫號康莊子江陰人

訪王麟樞不遇

王公子家江水陰芙蓉為裳錦為心焚香雨軒蘭葉淨  
下榻月館梅花深丹山鳳皇不易見碧海珊瑚無處尋  
有客相思在空谷歲月仰望來佳音

許璞

字叔瑛華亭人

九日有感

世事驚心節又催短衣破帽立荒臺斜陽木落烏爭噪

金史四八  
卷七  
絕塞雲深雁欲來十載江湖蓬鬢改  
幾家籬落菊花開  
平原白骨知無數誰向西風酌一杯

次成元章韻

海內風塵十載過莫年漂落奈愁何  
讀書避地衡門小  
拔劍成功甲第多魏闕又聞來白馬  
唐家還復獻金鵝  
野人翹首雲林下擬讀昌黎石鼓歌

董佐才

字良用號胥山人

讀杜詩有感

幾年京國暗戈矛淪落誰憐杜甫愁春漏也曾嗔錄事  
秋飢仍復問彭州平生忠義窮逾見小技文章老更優  
我亦此身無定處夕陽孤倚仲宣樓

次韻述懷

大塊茫茫本自然杞人無事謾憂天百年流景如雙轂  
一餉懽情直萬錢不是溪山嫌客賞何曾風雨為花憐  
細推物理休戰戰回首故人空墓田

題俞凝清小樓

凝清善畫

金史卷之八  
卷七  
戶牖脩然樹杪開小樓新結俯池臺書聲直與浮雲抗  
畫幅遙臨列岫來豈可胡床留俗客莫教明月照空杯  
元龍豪氣今誰繼述作須憑沈謝才

林洵

字季文天台人

觀丁祀

風作秋聲度八寰駿奔多士旦趨班宗周禮樂脩禋祀  
尊魯衣冠拜聖顏鳳宸香飄涼月下龍旂影動瑞雲間  
萬年道統垂天地洙泗東流遶泰山

董紀

字良史

送石達卿受淮南之辟

當代搜羅急俊英，豈容徒老鹿門耕。  
淮南幕府多招隱，水北山人最得名。  
參朮正須歸狄籠，鹽梅甫用入商羹。  
只應湖上秋風起，猶為鱸魚惜此行。

錢惟善

字思復

三味軒為張國祥賦

三味軒中品物殊，客來日共飯雕胡。  
四腮鱸膾吳中有，

千里萼羹洛下無孫子流芳真好事人生適意是良圖  
不因命駕秋風起那得高名在五湖

知稼穡軒為國祥賦

軒居誰扁知稼穡張仲孝友世多賢再三歎息戒無逸  
什一徵輸期有年睡濃黃犢夕陽裏興在白鷗春水前  
迎寒送暑無限樂試誦豳風七月篇

蔣惠

字季和

從軍漫興



士卒連艘寂不譁曉牽百丈步平沙霜橫劒戟明秋水  
風颭旌旗絢綵霞最憶仲宣能去國猶懷張翰苦思家  
無端又值江天暮落日蒼烟動鼓笳

城東小飲東鄭明仲劉復雅

青帘掛處潑醅濃握手吟行夕照中滿地雨晴芳草綠  
近牆水暖小桃紅當時不忝登龍客今日惟懷失馬翁  
拚却青蚨同一醉歸來戍鼓又鼕鼕

鍾律

字伯紀 汴人

贈一齋進士

前朝進士今為庶海上淹栖歲食貧風雨厭看花富貴  
冰霜愛寫竹精神南州冠珮閒中老北極星辰夢裏真  
邂逅相逢同一笑蒼顏白髮老遺民

方克常

題春亭思親卷

暖風拂面百花紅日日思親望五茸夢入承顏驚白髮  
歡生捧檄動慈容從官豈憚雲衢遠歸覲寧辭水驛重

蓮幕長才今小試化民匡政致公忠

慶葉振翁八十詩

八十仙翁兩鬢銀梅花標格玉精神  
田荆樹老千年澤  
竇桂香分五色春花下長歌來窈窕膝前行  
酒舞麒麟  
廣寒更有嫦娥約待看飛虹析木津

孫閏

立春日次陶玉樓韻

春江春水綠沄沄江上人家日欲曛  
水木盡隨龍角化

金  
卷七  
寒暄已闕土牛分縱橫誰復論王霸翻覆徒憐作雨雲  
坐老年華心益壯生憎鳧鴨亂為羣

題罨畫清曉圖送劉錄事

朝日團紅映兩厓水光晴漾錦紋沙竹枝草帶森魚鬣  
雲白山青相犬牙玉氣春浮仙子蓋畫橋人似武陵家  
銀瓶且盡船頭酒千里情思隔縣衙

用石上海仲謙韻送李治中之紹興任

勾吳客上越王臺駟馬駢駢佐郡來霸主尚憐文種死

蒼生空憶謝安才帶江襟海東南勝萬壑千巖紫翠開  
已喜民間魚稻熟篋樓醞酒句新裁

大雅集卷七

欽定四庫全書

大雅集卷八

元 賴良 編

唐珙 字溫如會稽人

過洞庭

西風吹老洞庭波  
一夜湘君白髮多  
醉後不知天在水  
滿船清夢壓星河

墨蘭

瑤階夢結翠宜男  
誤墮仙人紫玉簪  
鶴帳有春留不得  
碧雲扶影下湘南

孫華

字元實

楓橋夜泊

畫船夜泊寒山寺  
不信江楓有客愁  
二八蛾眉雙鳳吹  
滿天明月按涼州

倪瓚

字元鎮

蘇臺懷古



望中烟草古長洲不見當時麋鹿游  
滿目越來溪上水流將春夢過杭州

李節

字處約

次冷起敬韻

金剛嶺頭山雨晴深林黃鳥最多聲  
草堂隣近應咫尺樓子正同雙樹平

張以寧

字志道

題爛柯山效宋體

人說仙家日月遲仙家日月轉堪悲誰將百歲人間事  
只換山中一局碁

釋祖銘

字古鼎四明人

題熨襖圖

練光帖帖雪光開倩得鄰姑熨未裁郎在征途兒在眼  
十分寒向意中來

陳昌

寄謝履齋

水沈香冷簾紋清風入疎櫺鶴夢驚今夜天邊好明月  
清光偏照闔閭城

釋元本

字立中

秋夜懷崔府尹

銀河淡淡月微明花藥闌邊絡緯聲為問洛陽崔太守  
幾何秋色在江城

釋克新

字仲銘番陽人

次鐵雅先生送沈鍊師韻四首

會稽山前賀狂宅句曲洞口陶仙家參差樓觀五雲裏  
飛佩時時凌紫霞

詞章近接楊夫子丹術追師魏伯陽昨日有書無犬送  
祇令孤鶴遠傳將

白雲作衣霞作裾太平不愛紫金魚驢騎酒肆得佳句  
都向琅玕節下書

茆齋門泊武湖航絕勝王家輞口莊明月滿天秋滿地  
碧簫引鳳坐胡床

徐孝基

寄孤雲上人

能詩亦足張吾軍  
何處林泉不寄身  
最愛竹西歸舊隱  
擲杯海上看飛塵

程煜

字彥明

題明皇竝笛圖

華清宴罷卷霓裳  
重立東風竝海棠  
瑄莫吹新製曲  
有人乘月倚宮牆

鄭東

字李明永嘉人

題衛明鉉山水小景為管伯銘賦

故人招我雁山傍更入秋雲結草堂至今未滿李徵士  
白首猶貪著作郎

余闕

字廷心

京師送友

光祿橋西惜解攜春星欲傍露盤低自來宮柳多離思  
更著城烏在上啼

題小景

長淮烟水遶城斜壯士依依漂母家日暮槎頭人不  
到  
蜻蜓飛上野菱花

孫華

字元寶

贈日本僧觀語孟

日本沙門性頗靈自攜語孟到禪局也知中國尊朱子  
不學南方誦墨經

鍾虞

字安期吳江人

送梁子才還宣城二首

粵王城下水潺湲照盡行人鬢影班日暮登臨倍酸楚  
直疑身在木瓜山

荔枝樹下三年客識得王家十八娘恨殺釣龍臺下水  
送君先去斷人腸

春雨雜興次韻二首

誰向春風吹洞簫蕩舟女子畫雙橈不愁沾濕鴉頭襪  
愁殺螺江兩度潮



別院笙歌深復深  
美人何處寫琴心  
尋芳休怯春泥滑  
明日池塘長綠陰

翁仁

字德元章安人前進士

題柯敬仲墨竹

湘江何處弔湘妃  
極目愁雲是九疑  
欲寄所思秋水隔  
鳳簫吹徹玉參差

馮以默

字淵如

墨梅

一枝竹外夢春酣  
零落綃裳舞翠嵐  
天淡水平山月小  
有人吹笛過江南

金翼

字敬德天台人

題耿恭拜井像

據水先須護上流  
鑿山抵用井中求  
司徒不為將軍請  
安得殘兵脫虜囚

題明皇曲江春宴圖

五雲樓閣擁層闌  
帝子金根御白鸞  
日日醉花臨上苑

春風不似蜀中看

東宗庚

偶題

漁波微動上湘簾  
圓沼初成小鏡奩  
葉底翠丸青可摘

小娃纖手送吳鹽

董紀

絕句

東風細雨濕窓紗  
日晏黃蜂未報衙  
芳草滿庭隨意綠

金史卷八  
時時吹落碧桃花

小徑斜穿入竹林  
曲闌通轉亞花陰  
牆隈勢逼風如旋  
落地殘紅幾許深

俞俊

字子俊

次韻俞仲桓見寄

白髮和愁取次生  
關河千里故鄉情  
自從秋雁南征後  
日日淮邊問客程

秦州夜泊

蘆葉蕭蕭惱客眠推篷看雨月在船漁舟破曉入城去  
街頭魚蟹不論錢

張樞

題貴妃籠鸚鵡圖

內苑宮人紫綺袍金籠鸚鵡翠絲絛當時亦有承恩者  
不獨雲霄一羽毛

宮樣蛾眉翠黛齊髻鬟微按鬢雲低自言鸚鵡能言語  
不道漁陽動鼓鞀

買閭

字兼善

八月既望訪古鼎上人時庭桂盛開因賦絕句以

贈

桂花陰下坐談空  
恍在清虛玉府中  
海月滿庭秋一色  
天香和露滴西風

春曉

香霧空濛落月低  
六街官馬散銀蹄  
芙蓉帳底夢初醒  
臥聽栗留花外啼

張守中

得家書

半年京國夢鄉廬  
曾買盧溝雙鯉魚  
昨夜燈花今日喜  
江南稻熟有家書

顧彥

讀漢史高帝紀有感

漢高功業與天高  
首祀尼山用太牢  
博士未興書有律  
不能無意責蕭曹

鄭昕

字彥升華亭人

夏德輔荷亭會衛叔剛全飲值雨二首

翠華擁出三千女  
玉杖扶持八十翁  
若使此花能解語  
主人日日醉春風

芰荷着雨洗紅粧  
未必蓮花似六郎  
一種風流人不識  
碧筒還勝紫霞觴

闕

闕



枝上雙雙老白頭  
雙飛雙宿意綢繆  
問渠何道頭能白  
穩處安身不濫求

趙鎮

字元鼎號寄軒吳人

題淵明像

托詠荆軻恨未消  
解官卻赴遠公招  
至今三月門前柳  
猶向東風懶折腰

徐醉墨小景二首

濃淡烟雲帶石林  
藤花如雪草堂深  
只疑龍井山頭雨

金史卷八  
飛過西湖作晚陰

瓜皮艇子釣魚翁  
烏柏根邊寄短蓬  
落葉不知深幾許  
吳淞江上問秋風

題玉環調鸚鵡圖

畫闌花暖露初乾  
妃子春容白玉團  
含笑從容調鸚鵡  
不知胡馬入長安

大雅集卷八

大雅集後序

天台賴善卿客授雲間課講暇嘗衰元之詩鳴者凡若干人篇帙凡若干首類為八卷名曰大雅集會稽鐵厓楊公首序且鋟且傳會兵變止今年善卿擬畢初志適有好義之士協成厥美詣予徵序後謂詩具一經詩亡春秋作噫詩奚亡特雅亡耳楚騷漢賦迨蘇李五言迄至唐近體皆古詩之變試觀唐數十百名家譬之宗廟器大而鐘鼎瑟瑟小而籩豆爵罍錯而有章秩而有文

要各備材用而不可一少焉道學於宋刑學於金其間  
鳴於詩者務亦出自機軸近代自虞文靖公近體詩行  
天下雷然爭倣競襲恐後弊甚一律千百較之唐遠矣  
夫採珠者極桂海採王者窮水天善卿不私已而汲汲  
以詩是採猶冰天桂海是窮則春容鉅作幼眇短詠不  
但得照乘連城而已將宗廟之器若錯而章秩而文也  
詩運環復大雅之音於是乎在義士雲間人陸德昭氏  
俞伯剛氏善卿名良宋名臣諱好古裔世業儒云席帽

山人王逢序

欽定四庫全書

後序